

Date – 04/07/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Larsap Gen (Rtd) Vijay Kumar Singh chuan Chakma Autonomous District Council-a Chief Executive Member atan Nirupam Chakma a ruat.
- 2. Tourism Minister Pu Lalnghinglova Hmar chuan State pawn atanga khualzin Mizorama tlawhtute rei zawk an cham theihna tur leh hmun tam zawk tlawh theih tura hmalak a tul thu a sawi.
- 3. Higher & Technical Education Minister Dr. Vanlalhlana'n Mizoram State University din tharah class kalpui a nih vat theih nan hmalak a ni a, Mizoram Engineering College pawh class tan theih tura kalpui mek a ni tih a sawi.
- 4. Prime Minister Narendra Modia chuan ni 2 cham turin vawiinah Rajasthan leh Gujarat a tlawh dawn. .

<><><>

CADC

Larsap Gen (Rtd) Vijay Kumar Singh chuan Chakma Autonomous District Council-a Chief Executive Member atan Nirupam Chakma a ruat.

Pu Nirupam Chakma ruatna lehkha hi vawiin khan tihchhuah niin District Council and Minority Affairs Department thuchhuah tarlan danin Larsap chuan Kamalanagar South Constituency atanga thlan tlin leh Chakma Democratic Alliance Legislature Party Leader Pu Nirupam Chakma chu CEM atan a ruat a, CEM thar hian District Council ah ni 7 chhung thlawptu a neih leh neihloh finfiah turin a ti bawk.

Thuchhuah tarlan danin CADC-a CEM atan Pu Nirupam Chakma in a pisa a luah rualin Governor’s Rule chu hlih a ni dawn a ni.

<><><>

AGRICULTURE MINISTER

Agriculture Minister, Pu PC Vanlalruata'n nimin khan Tualchenga Sawhthing sawngbawlna dinna tur hmunhma a tlawh a, kumina Sawhthing hralhnaa Sorkar-in support price a pek tur chu cheng vbch. 70 vel a nih thu a sawi.

Pu PC Vanlalruata chuan, ZPM kaihhruai Mizoram Sorkar chuan mipui hnena an intiam ang ngeiin thlai thar an lei mek a, Sawhthing bikah chuan Sorkar-in Rate a bituk Kg. khat Rs. 50 aia tlawma hralhte chu Rs. 50 a tlin lohna zawngah support price pek a ni a, nikum khan Sawhthing leina atana Sorkar-in support price a pek chu cheng vbch. 140 chuang a ni a. Kuminah erawh Sawhthing hralh dan kalphung an thlak hret a, Rate a that deuh bawk avangin support price pek tur hi nasa takin a tlahniam a, cheng vbch. 70 vel pek a ni dawn tih a sawi.



TOURISM MINISTER

Tourism Minister Pu Lalnghinglova Hmar chuan State pawn atanga khualzin Mizorama tlawhtute rei zawk an cham theihna tur leh hmun tam zawk tlawh theih tura hmalak a tul thu a sawi.

New Delhi-a Ministry of Tourism hnuaia Addl. Secretary Pu Suman Billa nen an inkawmna ah Mizorama tourism project kalpui mek leh project thar thehluh tur chungchang sawiin an inkawm a. State pawn atanga tourist lo kalte chu Mizorama rei zawk cham tur leh, hmun tam zawk an tlawhna tura hmalak dan tur an sawi dun a ni.

Pu Lalnghinglova Hmar hian Tourism lama hmasawнна tur leh hemi kawnga thawktute training-na tur chungchangah India Tourism Development Corporation Chairman Pi Mugdha Sinna nen inbiain Ministry of Sports and Youth Affairs Joint Secretary Pu Vineel Krishna nen Mizorama sports hmasawнна tur hrang hrangte an sawi bawk a ni.



LESDE MINISTER

LESDE Minister Pu Lalnghinglova Hmar chuan Mizoram chu mihring awm zat atanga chhuta thalai hnathawk rual tamna, MSME lama nasa zawka tan lakna tlak ani a ti.

New Delhi-a cham mek Labour, Employment, Skill Development & Entrepreneurship Departmen Minister Pu Lalnghinglova Hmar chuan Union Minister for Micro, Small & Medium Enterprises Pu Jatin Ram Manjhi chu kawmin MSME kaltlanga Mizo thalaite hmasawнна tur hrang hrang an sawi dun a. Pu Lalnghinglova Hmar chuan Mizoram chu mihring awm zat atanga chhut a thalai hnathawk rual tamna, MSME lama nasa zawka tan lakna tlak a ni a. Mizoram sawrkar flagship policy ‘Bana Kaih (Handholding)’ hnuaiah MSME kaihhnawih hmalakna tamtak a tel thu a sawi a ni.

Inkawmna ah hian kutthemthiamna kawnga hmasawнна hmunpui tur, Mizorama MSME Technology Centre din chungchang sawi dunin, state sawrkar atanga thehluh tulte tihfel hunah hma a lo lakpui tur thu MSME Minister chuan Mizoram LESDE Minister a hrilh a. Thalaite tana Mizoram sawrkar hmalaknate chu

lawmawm a tih thu sawiin, Ministry of MSME atanga puih theihna a awm chuan a inhawng reng tih a sawi bawk a ni.

<><><>

ASSEMBLY SPEAKER

Assembly Speaker Pu Lalbiakzama’n zirna chu hmasawwna kailawn a ni a, zirlai naupang ten hlawhtlinna an chan theih nan a bulthut atanga theihtawp chhuah a ngaih thu a sawi.

Khawlian khuaa Centenary Higher Secondary School leh mipui mamawh phuhrukna tura sak Bazar Shed thar a hawwna ah he thu hi sawiin Pu Lalbiakzama chuan hmasawwna hnathawh hrang hrang chu khawtlang mipuiten tangkai taka hman a pawimawh thu a sawi a, zirna chu hmasawwna kailawn ani tiin hlawhtling ngei tura theihtawp chhuah turin zirlaite a sawm a ni.

Speaker in a hawn tak Bazar Shed hi Pu Richard Vanlalthmangaiha, Lok Sabha MP Fund atanga sak niin cheng nuai Rs. 24,37,500 (Nuai sawmhnih pali singthum sang sarih zanga) seng a sak a ni a, Khawlian Centenary Higher Secondary School hi MLA Fund leh mipui thawhkhawm hmanga sak a ni.

<><><>

CENTRAL YMA & EXCISE

Central YMA leh Excise & Narcotics Department tangkawp chuan Central YMA Hall-ah Central Anti Drugs Squad (CADS) leh Zone Anti Drugs Squad (ZADS) te tan ‘Ruihhlo Kaihnawih Dan Zirhona’ hun an buatsaih.

Excise & Narcotics Department Jt. Commissioner Pu Peter Zohmingthanga chuan chan huam chungah mahni inphat a YMA-ten ruihhlo an do thin chu ropui a tih thu a sawi a, YMA leh Excise & Narcotics Deptt. te chu inthural takin, inhriatthiamna leh induhsak tawwna nen a ruihhlo do ho zel turin a chah ni.

Central YMA General Secretary Prof Malsawmliana chuan ruihhlo dotu lokal khawm te chu tanrual a ngaih thu sawiin tha thlah lo va theihtawpa inlunguala thawk ho turin a sawm a ni.

<><><>

H&TE MINISTER

Higher & Technical Education Minister Dr. Vanlalthlana'n Mizoram State University din tharah class kalpui a nih vat theih nan hmalak a ni a, Mizoram Engineering College pawh class tan theih tura kalpui mek a ni tih a sawi.

H&TE Minister ho hian nimin khan Planning Department Conference Hall-ah Higher & Technical Education Department hnathawh thlir let tum 2-na, Review Meeting neih a ni a. Dr. Vanlalthlana chuan, Department hotute thawh ho that zarah hmasawwna duhawm tak tak Mizoramin a hmu a, Lunglei Pukpuia Mizoram Engineering College chu class tan theih tura kalpui mek a nih bakah Mizoram State University din thar pawh class kalpui a nih vat theih nan hma lak zel a nih thu a sawi.

Minister chuan higher education tan theih tawp chhuah a nih thu sawiin, tun hnaiah thawktu lak belh anni a ti a. Heng thawktu lak belha hmasawnna tihchangtlunna chuan hmasawnna lian zawk a thlen ngei a beisei thu a sawi a ni.

<><><>

GST

Thu dik tawklo leh documents lem hmanga Goods and Services Tax(GST) registration dil an awm tih hmuhchhuah a ni.

Mizoram Sawrkar hnuaia Taxation Department officer-ten risk-based scrutiny, data analysis leh physical verification an kalpui mek atangin GST registration dilna thenkhatte chu thu dik tawklo leh document lem hmanga dil an ni tih hmuchhuah a ni a,

Registration diltu thenkhatte chu an sumdawnna hmun anga an sawiah hmuh tur an awm lova, an dilnaa document an thehluhte pawh finfiah theih a ni lo tih hmuhchhuak in , dilna thenkhatah phei chuan in leh dawr luah tur neitute hriat miah lohvin an hming hmangin dilna an lo thehlut thin tih an hmuchhuak tih an thuchhuah a tarlan a ni.

Mizoram Goods and Services Tax Act, 2017 dan in a sawi angin hmalak dan tur ngaihtuah mek a nih thu tarlang in mipuite, in neitute leh sumdawnna kalpuitute chu an identity document, an address, an mobile number, an e-mail address leh an personal information dangte GST registration atan emaw, sumdawnna dang atan emaw hmangtura dil an nih pawhin lo hmantir phal lo turin Taxation Department chuan mipuite a ngen a ni.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchintha puan leh a ni ang.

<><><>

IMD WEATHER

Indian Meteorological Department (IMD) Aizawl in ruahtui tlak dan data a tihchhuahah Mizoram pumah nikum aiin kuminah ruahtui a tla tlem zawk.

IMD Aizawl Director Sudheer Kumar Dwivedi hnen atanga thu dawn danin, District hrang hrangah March leh April thla chhung khan Mizoram hmun hrang hrangah ruahtui a tla tam a, a bik takin Aizawl leh Kolasib-ah ruahtui a tla tam hle a, Lawngtlai, Serchhip leh Mamit-ah te pawh ruahtui a tam hle a. May leh June thla chhung erawh district tam takah ruahtui a tla tlem a, kum 2025-a ruahtui tlak zat

khaikhinin kumin hian Kolasib, Hnahthial, Champhai leh Siaha-ah a tla tlem hle a ni.

District zawng zawng zingah Aizawl-ah June thla khan ruahtui tla tam ber niin 358.6 mm a ni a, Lawngtlai leh Serchhip pawh nikum aiin kumin hian ruahtui a tla tam zawk a ni. Fur a la nih chho dawn a, ruahtui tlak dan erawh a la danglam thei a ni.

IMD Aizawl Director chuan ruahtui tlak dan enin, ruah leh thli lakah mipuite fimkhur tur in a chah a, hmun hlauhawma leh leimin theihna hmuna chengte chu fimkhur turin a chah a ni.

<><><>

PM MODI VISIT RAJASTHAN & GUJARATP

Prime Minister Narendra Modia chuan ni 2 cham turin vawiinah Rajasthan leh Gujarat a tlawh dawn. Rajasthan ah hian Jodhpur Airport-a terminal building thar a hawng dawn a. He building thar hi cheng vaibelchhe 480 senga sak niin kumtina khualzin nuai 20 chuang dawl zo tur a ni a. Hei bakah hian Modified UDAN Scheme a tlangzarh bawk ang.

Vawiin chawhnuah Balotra panin hmasawнна project cheng vaibelchhe nuai 1.06 chuang man a hawng dawn bawk a ni.

<><><>

FIFA World Cup 2026 khelh mekah nizan khan Round of 32 inkhelah Egypt-in Australia chu penalty shootout hmangin an hneh a. Hun pangngaiah goal khat ve ve a an inhnehtawk hnuah penalty shootout hmangin chak zawk tur zawn niin Egypt an chak a ni. Tukin khan Argentina leh Cabo Verde te inkhelin hun pangngaiah 1-1 a an inhnehtawk hnuin extra time khelh a ni a. Argentina hian 3-2 in hnehna an chang zui a ni. Tunah hian Columbia leh Ghana te an inkhel mek a ni.

<><><>